

小峴山人詩文集

小峴山人文集卷五

無錫秦 瀛凌滄

新昌縣關帝廟碑

新昌縣關帝廟在縣治之西舊稱武安王廟明天啟四年知縣進賢朱仁臣所創建也屋僅三楹其東爲營卒閑馬之廐累被蹂躪祀事褻嫺神用弗歆歲久廟且圯乾隆六十年成都曹君令新昌謁帝廟慨然謀所以繕治者首蠲俸錢邑人踴躍趨事共輸錢一萬緡有奇飭材徵工旣恢旣崇整肅鉅麗什倍舊規閱五年工蒞竊惟伊古以來以功德忠義載在祀典者各廟於其鄉惟

帝廟祀徧天下幾與素王之宮社稷勾龍棄之壇壝埒
日所出入自都會以迄一井一聚縉紳大夫傭販賧隸
莫不奔走膜拜羶薌告虔而帝威靈昭融用福佑我烝
黎蓋神之在天下正如水之行地中無所往而不在者
也新昌於浙東爲小縣然

天子爲民而設之令縣無小拊循噢咻無非事者令其
繹思之帝佑民令毋虐民祇祇恐恐恒若帝之鑒臨於
其上無敢爲蝨賊毒螫情蠹猾漁以凶於而民帝其相
爾矣抑海陬山裔民庸有頑獷不率教者怵以帝之明
威罔不惶怖戰栗神奪氣沮惟懼神之禍已敬之哉氓

之蚩蚩尚其畏法奉紀矍然知尊親之義母有越志父
父子子兄兄弟弟協氣蒸而風雨以時疾癘不作則帝
之爲福於斯民者甚鉅曹君名署卿今已由新昌改錢
塘縣知縣新昌之人以廟工旣訖請爲文碑其石乃深
維帝廟之廢興實繫乎吏叱之得失以告吏叱并爲饗
神之歌曰

於赫帝烈神武揚噓噏漢火騰搏桑赤驥蹴踏來何方
乘雲駕蜺下九蒼風衙衙兮靈旂鵷神髣髴兮臨茲堂
重檐畫戟南山陽笙簫簫鼓鳴和鏘薦牲牢兮醑酒漿
神其福爾樂且康千秋萬禩垂無疆

重修表忠觀碑代

表忠觀舊在龍山以祀吳越錢武肅王鏐宋熙寧間知
杭州軍事趙抃請於朝以廢佛寺曰妙因院改建者蘇
軾奉敕撰文勒石旣而觀燬於元迨明嘉靖間卽廢靈
芝寺重立王廟寺葢王之故苑卽今所謂表忠觀者也
國朝康熙四十四年

聖祖仁皇帝南巡至浙江

賜額

今皇帝閱視海塘

親臨祠宇凡五賜

宸翰竝

命有司春秋祭如禮武肅王當唐季豪傑蜂起王以兵破黃巢討劉漢宏并越州誅董昌奄有浙東西之地民生不見兵革傳國三世卒能歸命向義以待有宋蘇軾論其忠謂過於漢之竇融見於碑記者詳矣余獨謂錢氏之忠在宋而其有功於浙之民世世享其利尤在築堤捍江一事蓋王建國錢唐濱江瀕海海潮由鼃子門入鼃吐鯨吼齧岸衝沙常爲民患自王始沿江置堰以障怒潮厥功煒焉其在祭法以勞定國能禦大災捍大患則祀之王之功如是是宜報功之典景錄隆茂禋祀

百世以至於今不廢前乾隆五十八年余奉

命巡撫兩浙謁王廟楣椳楔枋桷桷杗廟均朽壤不可
仍爰捐俸錢帥僚屬作而新之夫蘇軾爲宋臣奉敕爲
文故于文特表錢氏之忠余撫是邦仰維

本朝褒崇之意與王之遺烈則當誦揚懿美以垂諸無
窮義各有取也落成之日丹堊有耀甍密礧齊鉅麗踰
舊觀計始事至落成僅四閱月凡用白金三千兩有奇
工旣訖杭嘉湖道秦瀛請余記其事余旣爲文記之且
繫以頌頌曰

神州倣擾王奄東夏一劍光寒斗牛之禁鐵幢犀弩噓

踰風靄金隄孔固樟亭之隈爲坊爲障岷亭厥利垂八
百禩腰臘罔替錦衣故鄉奕奕廟庭獸鑲朱扉雲旗翠
旂天目崧嶽儼王之績羅剎灝熒王之澤於爍
奎文載揚王助豐碑有屹壽茲貞珉

。處州萬象山淮海先生祠堂碑

處州故余遠祖淮海先生監酒稅處也先生在處時嘗訪鬻法師於慈仁院旣去院僧繪像立祠具載處州府志今祠廢而像亦不可考乾隆癸丑冬瀛奉

天子命備兵溫處將重建祠而遽以遷調去乙卯冬始自杭州刻先生像移奉處州圭山之蓮城書院又閱一年杭郡丞修君奉檄權處州事將行來謁別余語及之修君莅處以書來諭曰書院地故湫隘不克稱有萬象山者故郡城最高處其上爲崇福寺極爽塏今以寺中之東偏三楹重加黝堊設神龕奉先生像祀焉祀之日

自郡大夫以下及處之士民咸往瞻拜如禮此處州萬
象山之所由有先生祠也。瀛惟先生少負經世略強志
盛氣好談兵爲蘇文忠公所賞旣而不効于世乃一意
託之于文章迨坐黨籍出倅杭州言者論其增損實錄
橫罹貶謫監酒稅於此而小人承望風指猶未已卒以
謁告寫佛書削先生秩遷徙嶺海易曰君子得與小人
剝廬君子小人之進退剝復係乎國家之治忽宋自黨
禍興而神州陸沈後世士君子過先生祠所當太息痛
恨于紹聖之已事也。願當時之禍先生者其骨已朽而
先生及諸君子之名至今猶在天壤亦可見小人之禍

君子無往不福。君子小人之智適成爲小人之愚已矣。而先生踪跡所至。官于其地者。無不爲之流連感慕。況又爲其子孫如瀛者。歟。瀛往來處州。未至萬象山。聞其地俯臨城郭。近挹溪光。望之若圖畫。蓋括蒼一郡之勝。而又與姜山近。卽宋時酒稅局先生之靈。其憑依於是無疑也。修君名仁。漢軍鑲藍旗人。由舉人出爲知縣。遷杭州府總捕同知。今署處州府知府。祠之成。繫君成之。麗水縣知縣常熟邵培惠。處州府教授海寧張駿。麗水縣典史無錫侯寶樹。並襄其事。例得具書。

。洞霄宮三賢祠碑

洞霄宮舊有祠祀宋李忠定公朱文公後又有石齋嘗
院祀明黃石齋先生歲久祠及書院皆廢嘉慶元年道
士張禮恭重修洞霄宮建堂三楹仍奉忠定文公兩賢
栗主祀焉桐鄉馮鴻臚應樞爲之記而書院則未有復
者閱一年仁和宋學正大樽何秀才元錫李秀才堂卽
附石齋先生於祠而并祀之洞霄宮者南宋時人主優
禮大臣於其去位時予祠祿處也忠定於宣和中繫天
下重望屢進屢斥迨建炎初數言事又爲張浚論罷提
舉洞霄宜後人之建祠以祀也文公立朝僅四十日未

嘗奉有洞霄之命而後之人竝祀之者豈非賢人君子
不擇地而人思之耶至石齋先生生明之季嘗講學於
此朱檢討彝尊具載其事今諸君以書院旣廢奉先生
以配忠定文公三賢者後先竝祀一堂所謂禮以義起
者也余嘗論士君子之進退繫乎國家之安危高宗不
用忠定而兩河不可復光寧不用文公而宋祚卽於衰
莊烈帝不用石齋先生而明社屋詩曰取彼讒人投畀
豺虎黃潛善張浚王淮溫體仁楊嗣昌之徒則已耳彼
人主者獨何爲哉雖然忠定諸賢蓋皆學孔子之道者
也經曰任重而道遠仁以爲己任死而後已忠定有焉

又曰國無道其默足以容既明且哲以保其身文公有
焉又曰志士仁人毋求生以害仁有殺身以成仁石齋
先生有焉余不敏備官於浙諸諸君請爲文以碑之迺
又爲享神之辭曰

撰吉日兮良辰開廣庭兮薦芳醕繫洞霄之遺墟徹蕭
光兮靈宇泝三賢兮在昔佩長劍兮陸離蘭當門而見
鋤兮蕢葦施兮溷江離吁衆女兮謠詠羌嫉妬兮蛾眉
彼讒人兮高張雄虺九首兮蟻舍沙叮國無人兮殄瘁
悵白日兮西馳審魂魄兮來歸鏗鯨鐘兮擊鼉鼓揚朱
旗兮翠葆採丹荔兮擷芳杜維潭潭兮斯宮永昭示兮

來許

。李忠定公祠堂碑

古君子以其身負天下之重。而國家之安危繫焉。其進也有所爲。而社稷蒙其福。天下於是有磐石之固。及其既還。而蒼生無所託命。爲之君者。亦無所恃賴。馮依以長保其國。此余讀史至宋李忠定公之已事。而不禁爲之盡然流涕以悲者也。公當宣和之季。屬都城大水。首陳災異。其後決徽宗之內禪。堅欽廟之城守。具戰備。闢和議。不幸遭讒遠竄。而建炎紹興閒。力主恢復。忠謀碩畫。昭昭然揭日月而行。卒以祠命去位。未究厥用。朱子序公奏議。喟然於天之所以生公者。實非偶然。而又謂

天之愛人不勝。夫氣數之力不其然哉。不其然哉。公諱綱。字伯紀。邵武人。自其祖賡遷無錫。父夔。官右文殿修撰。葬湛峴山。公旣生長無錫。故以梁谿自號。且名其集。其子孫多族居焉。今膠山惠山皆有公祠。有司春秋致祭。而長洲之祠。則肇建於嘉慶五年。爲最後。蓋公裔之自無錫遷長洲者。請於大府而成之者也。余嘗論公生平才略知勇。無一不本於學。故其所樹立。實有合於聖賢之道。孔子曰。所謂大臣者。以道事君。不可則止。曾子曰。可以託六尺之孤。可以寄百里之命。臨大節而不可奪。惟公皆不愧斯語。惜無以從祀孔子廟庭。爲

朝廷請者而其子孫散處大江以南猶能隨所居之地而建祠祀之豈非公之精神有自不朽於千古者與祠在長洲縣二十二都下九圖先是公後有明揚者方議興舉未行垂沒屬其子某無何某又病革命猶子東旭顓當事得請諏吉訓工自經始逮落成共糜白金若干兩并蠲置田八十畝有奇以供歲祀云又嘗攷公父母墓銘皆楊龜山先生撰著先生講學無錫依公以居公之學殆得之程氏而公弟有綸字季言者嘗爲無錫鈐轄屬官建炎元年秋有賊乘巨舟數百自蘇州逼無錫季言語縣令郝漸願以單騎從數人往諭賊後賊聞季

言諭果釋甲受犒行縣得無擾蓋其膽識過人如是今
人豈有能舉其名氏者故於文公祠石并著之余於公
嚮有仰止之慕乃爲迎神送神之辭曰

公之來兮何方舉雲旂兮降斯堂中原板蕩兮汲水湯
湯顏黯慘兮公心憂傷弭絳節兮江裔擊鼙鼓兮羅酒
漿百世不忘兮以永烝嘗

公之去兮何所雲容容兮風衙衙侍帝旁兮無語羌回
翔兮太虛駕海濤兮獨延佇俯八荒兮浩茫茫閩山阻
兮蒼莽公不見兮涕洟無斯人兮眇愁予

。明太子太保南京吏部尚書諡忠懿寶摩徐公墓
碑

順治乙酉

大清兵南下江南主旣降其間故明遺老抗志矢節雖
知

天命有屬斷脰捐軀以死殉國難者不可勝數嘉興寶
摩徐公其髧也乾隆丙申

聖天子隆褒卹之典

詔勝朝殉難諸臣子專諡通諡入祠有差其得專諡者
僅二十有六人而公赫然與其列諡忠懿公名石麒字

寶摩號虞求江南青浦籍浙江嘉興縣人天啟壬戌進士除工部主事削籍崇禎初起補南京禮部郎中尋改吏部遷南京尚寶卿應天府府丞歷太子太保南京吏部尚書罷歸嘉興城將破時公方居城外至城下呼曰吾大臣不可野死當與城存亡城上人開門納之越宿城破公服朝服自經死烏虜公在天啟朝樞人枋用屢以事牴牾被誣幾蹈不測烈皇帝御極起用爭鄭三俊之獄陳邊計又疏畱言官姜埰熊開元以是得罪落職比福王監國復召用力辭不獲慷慨言七事格馬士英之封拒中貴田成輩之請旋罷斥而南都亦失矣蓋公

平日剛方耿直。侃侃然不屑爲姘媵骯髒之行。其見危授命。非僅取辦於倉卒者所能及也。公墓在海寧龍山之原。其歿後三十七年。餘姚黃黎洲先生宗義因其孫功燮之請。爲公作神道碑銘。所書公生平事蹟及生卒年月。婚娶子嗣。甚具。見黎洲集中。今公神道無是碑。海寧士大夫別爲立碑於墓。請余文其石。余惟表忠闡烈。守斯土者之責也。公之歿已閱百數十年。幸逢不諱之朝。予謚易名彪炳冊府。余旣素慕公之人。又適爲監司。於是則表章公墓。誠莫如余宜。公無子。初立爾穀爲子。後又立柱臣。爾穀國子生。公旣殉節死。爾穀亦以事被

人明一ノ三集 卷三 三
逮死江寧例得並書請余文者查生揆海寧州學生

嘉興廣仁寺瘞骨四塔碑

嘉興之爲郡、衢市闐溢、民物輻輳、又四面皆水、溝涂川
澮、畛阡陌、回互參錯、是以民無隙土、巨室富家之饒
于貲者、親死不惜金錢、購善地以廣堂斧、而貧民力絀
不克葬、灌莽田野之間、溪港之側、暴櫓纍纍、雨淋日炙、
遇水漲輒漂沒、乾隆乙卯、余分巡浙西、道嘉郡、見而傷
之、越嘉慶元年丙辰春、嘉之人士僉名呈請于余曰、嘉
興郡城東北二里許、有廬山菴者、僧了根住持、于是菴
甚隘、了根居之、始建大殿五楹、翼以廊廡、基漸廣、了根
憫骷髏之多暴露也、于殿之後港拓地百弓、取郡中暴

構之不克葬者將設塔四座聚而瘞諸郡人重其義敢請于公勸成之余聞而善焉閱數月塔成了根乞爲文記其事余惟先王之教於人爲最重生則爲衣食以贍之死則爲棺槨以葬之所爲養生送死以求無憾于仁人孝子之心者甚詳且備若釋氏則外形骸一死生解脫焚化身且不有又何有於他人之身然聖人言仁釋氏言慈悲目之所觸動於慈悲之念而亟爲之所思所以安之而後已此則釋氏之教之無戾于聖人而未始不爲功於世者也三代以降民旣失其養生送死之具徃徃王政所不能及而佛之徒能及之如了根者可謂

賢矣菴之名不見於志乘舊傳宋南渡時扈蹕諸縉紳
奉檀香大士像來此要亦無可考了根爲悟修禪師嗣
法弟子歷主覺海聖因法華諸方丈余旣諾其請爲易
菴名曰廣仁寺而并記其掩埋事顛末如此俾錢諸石

○禮部侍郎天台齊公墓表

乾隆元年丙辰

天子召試制科之士與是選者多一時名流宿學而天台齊公尤以博洽稱旣入翰林屢試高等累遷至禮部右侍郎未幾以病乞養歸歸十餘年而宗人齊周華之禍作牽連頌繫京師蒙

恩放還還甫匝月而卒年六十有六公諱召南字次風號息園世爲天台人明正統中有以兵部郎中殉土木之難謚忠節諱汪者公之七世祖也曾祖諱之仲祖諱仁龍父諱鼎皆以公貴

贈如公官公生而器宇凝重甫就外傳屹然如成人少
穎敏讀書十行俱下既補博士弟子員學使者皆以奇
士目之雍正癸卯由選拔貢生中式本省鄉試副榜以
博學鴻詞薦者聞浙總督程公元章浙江學政帥公念
祖也公以

召試二等改翰林院庶吉士散館授檢討時

天子方右文稽古凡館中纂脩之役如

大清一統志明史綱目

武英殿校勘經史諸總裁悉以委公蓋公平時於學無
不博自天文律歷以至山川疆域險阻要隘瞭若指掌

而又深知古今治亂得失通習掌故故於經則通漢唐
以來諸家之郵於史則兼涑水紫陽之義法其經
進之書皆蒙

上嘉賞而瀛則嘗讀公輪進劄子以爲尤似真西山大
學衍義文字非尋章摘句之士所能及公萬一也公之
爲翰林也充

日講起居注官在

上書房行走既由檢討遷中允侍讀又遷侍讀學士擢
內閣學士兼禮部侍郎旋

授禮部右侍郎以一諸生不數年驟躋卿貳人皆謂公

特以文詞被

知遇顧公問學淹貫世盡知之至其立朝耿介仇直有不媿古大臣者雖同列或不盡知且公位望雖顯總不出文學侍從之列又遽乞歸未盡其用此又天下所共惜者矣公以乾隆十四年正月自

上書房歸澄懷園墮馬觸石幾殆

上遣蒙古醫療治少瘳是冬遂以母張太夫人年老陳情解職歸歸後累主莪山書院敷文書院講席造士甚衆齊周華者公族兄也獻其所著書於巡撫多不法詞涉公公以是下刑部獄

上鑒公無他僅削職蓋非

上不能知公而亦非公之樸誠不能蒙

上始終保全如此也公卒以乾隆三十三年五月二十三日子式遷葬公天台花坑之原仁和杭堇浦先生世駿銘其墓閱二十有七年瀛官於浙以事過天台宿公舊第於是式遷年六十七矣以瀛少時嘗以詩文見賞於公有知己之感屬爲文表公墓瀛不敢以不文辭公所著有水道提綱三十卷已刊行又歷代帝王表十三卷後漢公卿表一卷寶綸堂文集若干卷詩若干卷藏於家公具異稟目炯炯能矚一二十里許嘗登杭州之

鳳凰山視隔江西興渡人歷歷可辨又嘗於山頂指雲
所起處掘地得奇石皆似古篆籀名曰天然圖章爲文
銘之公故精術數之學方被逮之前一年筮易逆知後
事以語其子旣而皆驗公娶張氏

封夫人式遷國學生孫一

○雲南永北府知府袁近齋先生墓表

浙江袁近齋先生沒三十六年余始識其子鈞應

詔首舉爲孝廉方正鈞彊志勵學因諸生久而先生則
世所稱魁然儒者且賢大夫也鈞以先生旣葬而墓道
無文乃謁余杭州而出秀水鄭贊善虎文所爲傳乞余
表其墓先生諱德達字性三一字信吾近齋其號寧波
鄞人袁故鄞名族其先有鞠邨先生士元累膺薦官國
史院檢閱士元孫尚寶卿忠徹益顯於時祖茂啟父鰲
竝

贈朝議大夫刑部郎中妣陳氏曹氏黃氏竝

贈恭人程氏

封恭人先生以乾隆六年舉於鄉、七年成進士、試刑部、時華亭張文敏方爲尚書、才先生授生事、會副都御史仲公永檀以言事下於理、病亟、先生據例請文敏以仲病狀上、俾出獄視疾、先生故仲門下士、文敏用以誚讓、先生力爭之、文敏卒不應、而仲竟死獄中、由是先生直聲震朝野、刑部例凡奏獄必推一人屬稟、同官以先生熟刑律、輒屬先生、先生旣主之、而委同官之號爲賢能者、陳之堂上官、或咎焉、先生曰、刑部多死獄、我欲生之、而自爲功、忌者必爭之、今以功歸彼、彼且助我、時有趙

如勳者定州人也。屬先生爲直隸司郎中。而如勳有復讎之獄。先是如勳父和被其同姓趙簡者毆斃。簡論抵越十五年。而如勳殺趙宋。詣有司言宋實同簡毆殺其父。而屬簡獨承。宋得詭免。如勳弱從兄趙欽錫不平。嘗控宋以誣論。徒稍長。母爲言狀。母死。乃竟殺宋而詣獄就死。有司當如勳斬。先生爲倣駁復讎議上之。如勳得減戍。旣而出。爲雲南永北府知府。永北在金沙江外。萬山中。夷獠雜處。其俗蠢蠢頑悍。無禮教。人倫乖廢。父子夫婦莫辨。民極貧。地瘠。告不知治。先生至。親教之。畊。疏墾。灌殖如內地。又興塾學。以開其子弟。俾曉倫理。境內

蒸變羞前之爲大吏某者徵金於先生無以應怒令人探刺官事不得大吏慚服將薦之而先生丁繼母憂歸服闋授廣西慶遠府知府未行卒於京師年僅四十有九余嘗謂古之治獄者無不原本於經西漢多通經之士其治最爲近古非如後世習法家言但據律令剴斷生死而已甬江尚儒術先生官比部深明律意傳以經義用能平反冤獄及爲二千石煦煦懇懇教民成俗綜其生平不怵於勢利不爲時風所動搖蓋其得於學者深而惜其施之止於此也先生卒以乾隆二十五年正月二十二日娶陳氏與先生同葬於鄞之西山前舉子

一卽鈞筵室洪出

、馳贈內閣中書徐二磯先生墓表

乾隆四十有二年恭遇

皇太后升祔大典

聖天子廣錫類之仁

詔內外大小臣工予封贈如制竝許推恩所自及於外氏時瀛官內閣中書得請馳贈外王父如瀛官外王母贈孺人外王父姓徐氏諱德宗字于軻號二磯以詩名於時世稱二磯先生崑山人也明宏治中有官刑部主事諱申者以爭壽寧侯獄予廷杖是爲先生七世祖曾祖開法縣學生累贈光祿大夫東閣大學士祖乾學康

熙中由一甲進士歷刑部尚書以文章經濟爲世宗仰
與弟吏部侍郎秉義大學士元文號東海三徐父樹敏
康熙壬戌進士河南安陽縣知縣先生少有異稟弱冠
工詩太倉吳侍御暘亟稱許之顧先生昆季多以仕顯
而先生少補博士弟子貢成均竟未一脫諸生籍先生
旣不遇自放於酒益以詩鳴中年山游四方北歷燕豫
齊魯之郊西涉汾晉南浮湖湘所至得故人贈遺歸時
輒傾其橐嘗居無錫時先南沙先生杜翰林詔僧妙復
皆好爲詩先生皆從之游又與布衣惠雲朱克敏邵燮
輩結詩社自署曰蓉湖逋客晚歸崑山向時司寇公故

宅所謂冠山堂者廢斥殆盡。勵存危樓數楹曰頤保者居之。未幾卒。著有二磯山人詩集八卷。今存四卷。雜志六卷。卒以乾隆某年某月某日年六十有八。外王母姓秦氏。瀛之嫡祖姑也。曾王父生女子子丑人。外王母實居長。既適先生。先生性稍卞急。又嘗任酒。外王母婉婉順從。無違言。先生既豪邁。田產貨財皆不以屑意。而外王母節縮衣食。歿時猶有田若干畝。以授余舅氏先生。生一年卒。是爲乾隆某年某月某日年六十有七。子一傳愷。監生。考授州吏目。女一。卽先恭人。歸於先大夫乾隆乙酉。舅氏歿。先恭人請于先王父葬先生暨外王母。

於無錫惠山之望公塢而以余舅氏耐方先生之葬墓
石無文越今三十有二年而先生孫家相始屬瀛爲文
以揭於先生之阼

○廣州府知府顧涑園墓表

余官杭州、獲交前廣州守顧涑園先生。先生之齒長余二十有四歲，以鉅人長德，每修敬於余。余報謁，屏車騎入，則先生居委巷中，屋數椽，甚陋，儉從一人，以貧授生徒。自給見者，不知其嘗爲太守也。豈所謂處脂不潤者歟？今年冬，余述職至京師，還聞先生沒，且葬有日矣。其孤以狀乞余表其墓。按狀：先生姓顧氏，諱光，字彥青，號涑園。以舊居梅東橋，嘗自號河干先生。晚歲又稱梅東老人。世爲浙江仁和人。祖人豪，父濤，並有隱德，贈文林郎、廬龍縣知縣。祖妣邵氏、陳氏，妣詹氏，並贈孺人。先生

年十八補博士弟子員乾隆三年戊午舉於鄉十七年壬申揀發直隸以知縣用補清豐縣知縣調盧龍遷貴州安順府郎岱同知擢廣東廣州府知府以忤大府引疾歸先生宅心恕處已廉講求經濟務爲有用之學其官直隸所領多劇邑郎岱在萬山中苗民雜處廣州又爲粵首郡案牘填委先生所至輒辦治前後賑饑民懲奸宄雪冤獄雖未竟其施皆有政蹟可紀而余所親得之於杭人者則尤信而有徵焉蓋先生旣嘗令清豐嘉慶三年先生年老家居久忽有十數人者闖門入闞者問之曰我清豐縣民也公有德於吾邑今以禮天竺太

士至聞公健在故來謁先生扶杖出其人皆羅拜出梨棗山茗陳於庭爲先生壽中有范葉兩老人者曾識先生面能說四十年前時事移時辭去復再拜於門外觀者填塞是時余方在杭杭人皆藉藉爲余言之烏虜吏道之雜也吏視其官如傳舍視其民如途人甚且殘虐之不恤而百姓於是乎苦若先生去清豐四十餘年而清豐民感其德不置如是是先生之治清豐者可知卽其所以治他邑他郡者亦可知矣先生工舉子業從遊甚衆今大司農大興朱公少受經始終敬事焉又好爲詩古文辭刻有櫛頌堂詩集若干卷清真典雅皆可傳

者嘉慶三年戊午重與鹿鳴宴時先生年八十二矣又
二年卒時爲嘉慶五年十月二十七日距其生以康熙
五十六年四月十四日得年八十有四娶屠氏例贈恭
人先卒男子子二侄齡修齡皆諸生副室張出女子子
五屠出者二嫁娶皆士族孫女二墓在某縣某岡之某
原

○ 鴻臚寺卿星實馮君墓表

嘉慶五年閏四月二十二日、前鴻臚寺卿桐鄉馮君卒於家、年六十有一。於是君以乞養歸、蓋八年矣。君長余三歲、前後皆以制科得官、而君先於余十一年。君直軍機久、余晚進、嘗同直。君之歸也、余適監郡浙西。君有家在杭州、數相見。君沒、屬其孤以隧道之文來請、其何可辭。君諱應樞、字星實、晚自號踵息居士。其先自湖州遷桐鄉。明隆萬時有官湖廣左布政使諱孜者、君八世祖也。曾祖景夏、康熙中舉人、歷刑部左侍郎、祖錦、以君贈中憲大夫、父浩、乾隆十三年進士、由編修改監察御史。

妣潘氏贈恭人生子三君其長也年十八補博士弟子員中乾隆二十五年舉人聯捷成進士三十年

上南巡

召試行在授內閣中書逾年入直軍機處隨遷宗人府主事爲湖北鄉試副考官督四川學政以事鐫級復原官累遷員外郎郎中充坐糧廳擢山東道監察御史通政使司參議鴻臚寺卿君爲人沈毅有智識才情感發審幾立斷其直軍機也制草多以屬君纒纒千言援筆力就機禁重臣輒倚君爲重有重獄必委君方臨清王倫亂其黨有梵和尚者旣就訊刑部將悉逮寺僧梵獄

辭又妄稱倫黨數千具有書冊將并泊之君以連染衆持不可事皆寢其誣枉者立予釋蓋君於事務持大體意所不可侃侃爭執必得當乃已乾隆五十六年出爲江西布政使江西吏治骯髒君至思有所振刷而於大府多不便君撐拄其間卒多掣曳先是河南河洩

上慮東南回空漕艘受兌過期下撫部詢問撫部援舊例用民船載赴淮上之案復奏而漕艘已浮江南來將達南昌撫部護前奏檄武弁止其來并捉小舟數千備運一時船戶羣然闕而所止之漕船譁於青山下武弁懼馳告撫部撫部無如何君乃盡釋小舟之受雇者而

別遣官趨糧艘不三日皆泊會城卒無事會城首縣常
平倉久無儲君責所司采買如額而民不擾它州縣如
之且請撫部以實入告禁貪冒絕饋送言甚切而竟以
撫部事牽連解職吏議當戍軍臺

上鑒其無它許出贖鍰貰其舉仍爲吏部郎中累轉復
遷鴻臚寺卿方駸駸嚮用而君以養親歸矣烏虜自余
直軍機以來見朋齒之偕於通顯者名位往往出君上
獨君則

天子知之大臣知之而其表見止於此何與君之在杭
州也君旣臞就余余亦樂過君諮詢地方利病余於是

益得窺君之蘊每行部至嘉禾則其太公孟亭先生必率季子編修集梧過余款語移晷蓋君父子兄弟皆厚余今君沒不獨孟亭先生與編修君之痛而亦余之所歔歔流涕以悲者也君居平爲詩尤嗜蘇文忠嘗彙各家舊注加以訂誤補缺刊行之共若干卷娶陸氏兩淮鹽分司平湖某女封恭人前君卒子二振輝續熙女九振輝卽以五年九月十八日合葬君與陸恭人之柩於嘉興縣四收字圩費家浜之原君生平事迹具君所自述特采其在官之大者件繫之以表其阡

。薊州知州王君墓表

崑山王君惺如嘗官薊州知州會當軸者營生壙於薊
遣家奴劉姓者往治之劉要君出迎并誅館舍於君君
謝焉劉憾君甚因進蜚語當軸者言於直隸總督將撫
他事劾君遽以病免歸歸數年而君歿其孤福璧嘗乞
余文誌君墓時以當軸者勢方張遲之未及爲又三年
而當軸者敗乃爲文表之曰君諱若常字心如惺如其
號也曾祖某康熙某科進士官中書舍人祖某贈萊州
府知府父某贈福寧府知府妣某氏贈恭人君以錢唐
籍入貲爲西城兵馬司正指揮遷光祿寺署正大理寺

左寺丞再遷刑部奉天司員外郎廣西司郎中擢福建
福寧府知府其官刑部案牘多平反諸城劉文正公器
之比守福寧有福鼎縣民林某者以人命誣服君訊得
實告之上官釋其罪無何左遷直隸山海關通判由通
判遷薊州知州方君之見惡於當軸也余適在軍機處
當軸者呼君名揚言曰某無狀已語總督罷之矣余親
聞之故尤得其實君罷官後貧幾不能歸薊之民時以
酒食餉君并助之歸烏虜此可知君之所以治薊矣今
年春當軸者既欺

天子詔贈故監察御史曹錫寶都察院左副都御史蔭

一子蓋錫寶嘗劾劉姓恃勢奢侈者也錫寶號劒亭故與君善其在京師時兩人各以號相呼惜君之事無有聞於

朝者余特揭之於阡俾後之人有傳焉君生以雍正壬子七月十九日歿以乾隆甲寅十二月二十五日娶姜氏封恭人有賢德先君卒合葬崑山迎恩莊之和村子五人長某次卽福璧俱監生又次某某景星舉人女六人婚嫁皆士族孫六人君與余故中表行福璧又娶余從女弟是以余知君爲詳

。沈秋渚墓表

秀水沈君秋渚以嘉慶七年九月十七日卒於家先是南康謝公蘊山巡撫廣西君參其幕無何君歸謝公沒而君亦沒其孤作梅以是年某月某日葬君於某鄉某原邈年而余始表之君諱德鴻字磐谷秋渚其號先世自吳江盛澤遷秀水祖聚元縣學生父世錦亦諸生以君職贈奉直大夫妣陳氏贈宜人君少嗜讀書操觚爲文輒工補弟子員學使者試輒高等補增廣生家貧累丁內外艱乃以幕游江南時謝公自翰林出守揚州延爲書記而君於刀筆筐篋之學無不通其後公罷官再

起君雖嘗游歷他幕大抵從公之日爲多乾隆六十年
公司臬浙江尋權布政使而余代其事君始來余幕會
閩中饑浙江撫部請由海道運饑賑之舟甫發而海盜
乘機肆劫掠撫部赴台州督勦捕而運艘之受雇者分
泊寧波海口皆鼓噪余亟馳往挈君行至則集船戶曉
以利害曰若輩羈此苦無食耳吾當給若輩食且募盜
潰散卽令官兵護若輩行衆皆諾曰願如公言而署定
海鎮獲難民蔡長興等以盜申撫部撫部遽入奏而檄
余治其獄諸船戶多閩人與蔡長興等有連復聞於市
欲俟其至而遮諸途余出示解散之鞠之果難民遂以

實報撫部時余晨見官吏晝治獄夜點鄉勇而以一切
文書資之君君事至立辦無畱滯屬撫部又檄蔡長興
等械送台州君慮下府縣覆治仍周內其罪余曰撫部
賢者也當面謁力爭之由是君復隨余至台覆治者果
當蔡長興等爲盜余告撫部卒省釋提督某者方隨撫
部在台余在寧波時以定海勢方殷趨提軍赴定海而
提軍託疾不行署定海鎮某故懦怯又誣難民爲盜余
因竝請撫部劾奏之屬君代草呈撫部事雖寢而余與
君商榷吏事議論多相中大率類此是年謝公遷晉藩
去余亦謝臬事越歲公復來君又在公幕凡三年謝公

始奉撫粵之命。君以道遠不欲行。公固要之。乃行。嘉慶六年。余在湖南。輒聞公張弛厝注。得君爲助。犁然有當於人。書問還往。君數附書寄問。情好無閒。迨余謝病。君以入貲爲令。候除歸。而遽以病沒。烏虜以君之才。洞曉時務。僅假於人。以略見諸事。今之幕僚。非如唐宋節鎮。得自辟置。有職事。不得已由他途進。將得官。而天奪之。余嚮因謝公以交君。今皆沒。朋舊之凌替。人命之不常。不皆有恫於余心者邪。君居家孝友。工詩。尤好藏書。得三萬餘卷。購介石樓貯之。法書名畫佳硯。充牣其中。援例捐布政使理。小加一級。繼以工賑例。捐知縣。卽用娶。

吳氏諸生虔位女封宜人子二長卽作梅太學生吳出
作楫候選從九品側出後從父德融孫求焜求焯孫女
三君生平志行具行狀者大都前後參謝公幕時事余
不具著而獨按古人義法舉余之所以知君者以表之
烏虜是亦足以表君矣

。都察院左都御史竇公墓誌銘

乾隆六十年諸城竇公以磨勘事罷左都御史任居京師以病卒明年爲嘉慶元年其孤汝翼等歸公之喪將以某月某日葬公于諸城某山之原汝翼先期郵公狀寓書於杭屬銘公之墓。鳳辱公知最深不敢辭公諱光龍字元調號東臯曾祖某祖某父詵乾隆甲子舉人皆以公

贈榮祿大夫禮部右侍郎曾祖妣臧氏李氏祖妣牛氏沈氏妣張氏皆

贈一品夫人公幼負絕人之資家貧貸書於人覽卽成

誦一日讀文選卽操筆爲琅邪臺賦監司某公見而大稱賞之時公年甫十二耳十五補博士弟子員旋申丙辰本省鄉試副榜辛酉舉順天鄉試壬戌會試中式入翰林爲庶吉士散館授編修戊辰

御試翰林詹事府等官於

乾清宮閱卷者列公四等向例大考惟高等得遷官後等改官降黜有差

上知公特遷公爲右中允蓋公被

上知遇自此始未幾累遷至翰林院侍讀學士

御試一等特遷內閣學士出爲河南學政丁內憂歸逾

年會

上以

南書房缺人

命山東巡撫傳

旨起公公泣辭曰光祿方在衰經不敢奉

詔巡撫屬公陳謝公又曰不祥姓氏不敢自陳敬煩公代奏

上聞而遽之服除補都察院左副都御史視學浙江任滿還以與刑部爭秋讞事吏議鐫級

上許畱任如故屬有章知難者搆蜚語陷公

上知公深奉

命以對品用尋遣祭告南海所至却地方賂遺先是公弟光鉞令於粵迓榮祿公至粵公以是得覲榮祿公時公方欲有所陳奏出奏藁呈榮祿公榮祿公趨公上之會

天子南巡幸公詣杭州

行在將復

命而已奉有回京之

旨不果上無何

命署內閣學士越二年授順天府府尹畿輔叢弊公吏

胥多因緣爲姦公受事苞苴屏絕首劾薊州知州長全
聲名狼籍按治之特薦京縣蘭公第錫李公湖後官督
撫皆稱賢臣任府尹四年丁外憂歸服除再補原官蝗
蝻災公報聞親捕之因旗莊不出丁協捕與督臣奏辨
視職不數月

上又起公爲通政司副使遷宗人府府丞公爲府丞最
久凡十年復視學浙江特擢公爲吏部右侍郎會
上遣大臣清查浙江州縣倉庫竝有

旨問公公以實告且言督撫過往收受門包平陽令黃
梅科斂病民匿喪演劇條其狀以上論者誣公幾不測

公復侃侃奏論

上卒直公治黃梅罪而還公官復授宗人府府丞擢禮部侍郎又出爲浙江學政越三年以左都御史召還在

尚書房總師傅上行走公在禁近

上製文字輒

命公閱公撰文以進必因事納忠讀之如古劄子乾隆六十年充會試正總裁以所錄首卷多語疵被勘議落職僅降四品銜子休而公于是亦旣老且病矣公生平不講學而仁誼道德之旨不言躬行尤嚴析義利而要

之以母自欺立朝五十年揭揭然柴立無所顧慕剛直不能容人人多咀而忌之者惟以誠悃荷

聖主知屢起屢仆卒蒙保全而究亦未竟其施嘗言學貴有用如昌黎折王庭湊陽明平宸濠乃真學問故公于書無不闕而不屑沾沾於章句訓詁世之人僅以文章稱公未爲知公者也公得士最盛歷官中外位公卿者甚衆乾隆己亥有浙江巡撫王直望故貪墨其鄉試出公門朝京師與公遇于直房公以言規之直望怫然時公之亡謁公而厚致饋遺公揮其金絕不與通無何直望果敗公性開蕩遇同列下輩樂善汎愛言無所不

罄每與客談客起猶立語移晷刺刺不甯休瀛侍公稍晚而公於瀛尤厚公亡蓋知我者鮮矣公處已約敝縑惡粟如窮諸生歲入瘠田以贍貧宗人有所請不吝此皆細行不足重惟公生平大節雖公所未嘗告人與人所不及知者不能具書而按公之狀參以瀛之所嘗聞于公者略爲詮次已足以想見公之爲人公初娶張氏繼劉氏俱

贈一品夫人子六長卽汝翼乾隆戊戌進士宗人府主事汝璫汝璜汝咸皆國學生張出汝猗劉出汝翮側出女曰人孫十一人孫女十二人公之生以康熙五十九

年十月初二日卒以乾隆六十年九月二十二日年七十有六著有東臯詩文集應制集省吾齋稿銘曰維執不與選悞所讎飛謀釣謗弗改其輶厥施未究曷云其休其學則昌祛脂韜督包羅旁魄躡韓軼歐公實知我以銘公幽

。公自浙江學政以左都御史

召還一日富陽董公手執公所書金字扇大學士和珅見而語董公曰寫金字善用金無如竇東臯者遂取一扇屬董公代乞公書余適趨過董公曰秦君固善東臯先生者盍屬之因以屬余請於公公書就授

余還之書款稱致齋相國。自稱晚生某。蓋遵舊例。致齋和珅號也。又一日和珅

召見。出語余曰。子見東臯。告以有

御製文。命其製序。散直後卽來領。是日公隨詣和珅宅。領歸。謹撰序文。越日進呈。公沒後。編修洪亮吉上書言事。以前在尚書房。嘗被公指斥。附劾。公交結和珅。書扇稱師相。自稱門生。其誣公實甚。此事關係公生平大節。不可以不辨。瀛又記

刑部侍郎蘭泉王公墓誌銘

青浦刑部右侍郎王公蘭泉以嘉慶十一年六月三日
卒於家於是公致仕家居十有二年矣孤肇和述公遺
言屬余爲銘幽之交并郵公女夫嚴太守榮所爲年譜
以書抵余京師按譜公諱昶字德甫號述菴又號蘭泉
先世浙江蘭溪人高祖懋忠始遷青浦名列幾社以詩
名曾祖之輔祖璵父士毅三世皆以公貴累贈光祿大
夫刑部右侍郎曾祖妣雷氏祖妣沈氏妣陸氏生妣錢
氏皆贈封一品夫人公成童勵學卽擅文譽年十七補
博士弟子堯然出儕輩嘗遊長洲沈文愨公之門時有

吳中七子詩選其詩流傳海外公其一也乾隆十八年舉江南鄉試逾年成進士歸班銓選二十二年

鑾輅時巡江浙以

召試一等授內閣中書未幾入直軍機處

制誥文字多出公手遷刑部主事再遷至刑部郎中三十三年坐言語不密罷職會緬酋不靖阿公桂總督雲貴請公從來往永昌騰越間軍書旁午贊畫機宜公之力爲多無何阿公罷溫公福代之畱公戎幕如故屬四川小金川土司僧格桑構亂

上命溫公移師討之請以公行會

上復起阿公會勦公又參阿公軍除吏部主事擢員外郎郎中木果木之變公友趙公文哲隨溫公沒於事而公在南路得無恙事旣戢隨阿公奏凱還京師擢鴻臚寺卿

賞戴花翎仍入直軍機處計前後在軍營者凡九年始還尋擢大理寺卿都察院右副都御史授江西按察使丁母憂歸起爲陝西按察使遷雲南布政使調江西召爲刑部右侍郎時公年六十有六矣在刑部時屢奉命讞獄江南湖北咸稱平允乾隆五十八年年七十乞假省墓假還隨以原品致政退居三洲湖莊者十餘年

而以疾卒年八十有三論者謂公壯歲從戎名望重於絕域及爲藩臬督訟獄興教化所在有治行可稱方按察陝西時甘肅石峯堡之役公督兵防禦邊境賊以無擾勞績尤著公所表襮亦旣章徹於時而余則窺公生平志事殆將以古人開物成務之學見諸厝施而所見者止此尙不足盡公之蘊公嘗言其師王芥子先生太岳位至藩伯而其學多闕而不舒烏虜其卽公之所以自道與公窮研諸經決濫子史百家著述等身已刻者卧游軒詩文集金石萃編湖海詩傳續詞綜其宅尙有四十餘種藏於家同時名公如盧學士文昭王光祿鳴

盛錢少詹大昕論撰畧與公摺而金石傳播碑版照四
裔則或遜於公蓋由公游歷徧中外更事旣多故其詩
文闢富足備知人論世者之采擇有非它人所能及晚
年尤闢性命之旨以宋儒爲歸病士習骯骯風槩不立
貽書於余索東林志欲合天下書院香成一編以勸主
張名教蓋公之志旣老不衰如是公分校順天鄉試會
試者五主順天鄉試者一所得多知名士今有積官至
大僚者通懷樂善容接後進獎掖如不及尤篤於故舊
厚宗族嘗倣吳郡范氏例置義莊義塾而家實貧甚旣
斥私產償官逋至以丐貸自給娶鄒氏系出宋忠公浩

文學韋翰女無子以從弟曦之子肇和嗣女一遁室陸
出適金華府知府吳縣嚴榮孫二紹基紹祖肇和將以
嘉慶十二年二月十七日葬公於崑山之嚴字圩蓋卽
公生時所營生壙云先從祖文恭公芥子先生師也公
通籍後文恭卽延至邸舍與纂五禮通考余官中書後
於公者十九年而公折輩行交以文章道義相砥礪垂
沒猶以銘辭屬余其奚忍不銘辭曰

萬里荒微草檄勒銘依然儒生伉伉六經出領方岳入
貳爽鳩老而乞骸引年退休東南老宿誰與人師玉山
之陽堂斧在茲

顧春臺先生墓志銘

春臺顧先生篤行君子也種學不憚其後人幾顯融矣而不卒其施然先生康寧壽考天之予之者又不可謂不豐先生沒十餘年孤應春以嘉慶八年正月七日癸酉葬先生於無錫唐山之原以先生故余先大夫執友也乃持行狀徵余文以掩諸幽先生姓顧氏諱熙字玉田號春臺無錫人明武宗朝有以直諫杖闕下世稱洞陽先生諱可久者先生其後也曾祖欽明有孝行祖嘉太醫院吏目父又新國學生妣黃氏先生少凝重髻髻如成人與先大夫同學於宿儒陸炳西先生庚稱高足

弟子顧自爲諸生累試不遇亦僅以其業教授里中從之游者多有聞其學根柢六經尤邃於宋人語錄性理諸書故所養益充誠慤和粹色夷氣清居常事親孝舅弟宗鄰雍睦無間樂道人善赴義如飢渴殆荀子所謂言有壇宇行有防表者與乾隆五十五年六月十日以疾卒年七十有五其孫鉦已以南宮魁其儕入詞館矣先生嘗舉鄉飲大賓以鉦貴

贈贈朝議大夫吏部驗封司郎中娶高氏炳文女
贈封太恭人子一卽應春縣學生

封朝議大夫吏部驗封司郎中女一適吳仁育孫二鉦

乾隆丁未科進士歷官福建道監察御史卒鐸縣學生
孫女三適副榜貢生秦汝霖候選從九品楊炳宸寶廷
楫曾孫三宗沆寅清安治曾孫女二銘曰

其命蹇也奚以吁其緒光也奚以愉惟令名之無窮兮
人之師先生往矣視余辭

。贈太常寺卿四川布政使蒯裳楊君墓誌銘

嘉慶九年五月十六日四川布政使楊君蒯裳以勤於其職積勞致疾卒事聞

天子憫其勞贈太常寺卿予祭葬蔭一子爲知縣舊例惟在軍營病沒者得議卹君沒於位亦得仰荷

國家逾格之榮卹贈有加由是飾終之典於君爲特厚按狀君諱揆字同叔號荔裳其先自武進遷無錫曾祖宗濂祖孝先卽吾邑所稱介公先生者也父鴻觀與其世父邛州知州潮觀並工詩文不遇早卒三世皆以君貴贈如君官妣顧氏封太夫人君家先世旣以文學著

稱而其外氏自修遠先生諱宸者著名聽社百年來其學更遠有端緒君之兄蓉裳承兩家之學擅才藻君稍後出亦髫髻卽能文辭尤長於詩蓉裳旣由拔貢生出爲知縣而君以國子生於乾隆四十五年純皇帝召試江寧行在

賜舉人授內閣中書閱數年入直軍機處會廓爾喀酋長侵犯西藏誘執班珠爾等稱兵肆掠富察嘉勇公福康安爲大將軍奏君從行廓爾喀遠距碣門萬八千里君以書生從事自星宿海而外所歷懸厓絕壑險阻非人境層冰山積人馬驚墮而君枕戈浙劒磨盾草檄著

紙若飛及既成事撰文紀功勒石而還方君之在廓爾喀也蒙

賜花翎以內閣侍讀擢用既還除侍讀旋授四川川北道乾隆六十年擢四川按察使嘉慶二年遷甘肅布政使時四川方有軍事總統宜綿公奏留君逾二年始莅甘肅旋復調爲四川布政使越六年而沒計君由侍讀出外歷監司藩臬諸所經營擘畫其事實與軍旅相終始故其爲川北道也黔楚逆苗煽動君隨嘉勇公往討之公薨於軍閱三年苗始平迨任甘肅教匪方跳梁鞏秦階所在騷動總督松筠公統兵於外以省垣之事屬

君君至築城垣稽戶口問邊氓疾苦噢咻煦嫗民以不
擾無何移四川屬賊竄擾渡潼河焚掠三臺中江縣境
成都戒嚴總督魁倫逮問君設施脩具慮師行饋餽不
繼檄它州縣預籌糗糧以資飛輓而諸道兵餉仍匱乏
總督勒保公遠在軍營君亟疏請發餉銀二百萬兩幕
客斂手懼失

上意奏入報可君遇事果決持大體無所迴顧多此類
顧以軍興久資帑畧盡而請者絡繹輒無以應君權衡
緩急僅乃得濟教匪以次殲滅而君疾作不可治矣卒
之日年四十有五烏虜始余爲諸生訪蓉裳於邑之城

北始識君君年纔十三耳與譚南北史事甚熟及余官
中書君亦隨以獻賦得是官窮甚沈抑不得志者數年
阿文成公方在內閣少司寇王蘭泉先生爲公道君之
才公於君姓名不甚記憶詢諸余時余已遷侍讀詳以
告公君始以撰文知名同在軍機者一年而君有廓爾
喀之行君歸替余爲侍讀兩人相繼出外尺書通問無
間余衰老意君志事當不止是而竟止於是悲已君娶
南昌彭氏贈檢討元璫女封夫人子承懋三品蔭生捐
知州慧國學生以卹蔭例選知縣承懋候選知縣女一
未字所著有詩文集若干卷衛藏紀聞若干卷其孤旣

由成都歸君之喪將以某年某月某日葬於某鄉某原
先期啓裳乞余文誌君墓辭曰

過車駟驪稅於方輶旣章以馳孰爲摧之繫匪自人天
實隕而侯折其輶捐於中逵蜀江演迤劒門屢屨魂兮
來歸生斯葬斯潭潭幽宮陰風晝吹各其不廟徵余銘
辭

施兩窗墓誌銘

施君兩窗旣歿之四年葬有日矣其孤清翰先期以書來杭州請余爲文誌君墓余與君父子爲紀羣之交重以婚姻情甚暱知君最深不敢辭君姓施氏諱鳳立字丹彩兩窗其號無錫人系出魯施父八傳爲孔門弟子常宋朝奉大夫諱天瑞自櫛李遷崇明明初有諱孟懷者又自崇明遷無錫是爲無錫施氏始遷祖君曾祖諱廷輔祖諱舜明生子五長諱禹言由歲貢生教習館期滿授湖南之安化縣知縣季諱禹德太學生
敕贈登仕郎卽君考也妣宣氏

封孺人太學君績學有文與其兄砥礪切磋著聲里閭而卒不遇其兄游京師太學君遂獨持門戶君少穎異工於文銳意舉子業既壯乃棄帖括代太學君庀家事君鮮兄弟行以一人權羸縮均出入其家日隆隆起君事親孝又善事諸父方君世父之令安化也官甚貧旋乞休重負逋累不能歸君橐金馳抵安化爲之料簡親護其世父歸里君居家敦睦族人之取資於君者周旋委至無倦容而此則其生平之大者先王父溪隱公與君世父善時余未識君而君世父輒爲先王父道其事余是以知君之賢乾隆乙巳丙午間余奉諱里居始與

君日過從君所居北郭外廛市囂雜每見君門庭闐然
意致閒遠居常習勞勤無絲竹狗馬之好服御樸嗇偶
談古今事輒中條理值歲祲周卹施與不吝而亦不以
告人蓋余所得於君者又如此配錢氏有婦德

封孺人先君卒君之生以雍正十年二月二十三日歿
以乾隆五十八年八月二十三日距其生年六十有二
敕授登仕郎候選府知事嘉慶元年十月初一日清翰
合葬君與錢孺人於無錫洛社鄉之花渡里子一卽清
翰太學生娶於嵇女四人孫五人長郡學生曾培嵇出
卽余壻餘側出孫女四人銘曰

烏虜斯人其貌也溫其行也淳今也則亾其潛其藏長
爾子孫善人之慶烏虜

周孺人墓志銘

門人武康徐生熊飛之母周孺人諱英蓋諸生周衡中女徐君鴻範室也夫早卒教其子成立爲寡婦者餘三十年而孺人沒時嘉慶六年十一月九日也年六十一越明年某月某日熊飛將啟父之兆而以孺人合窆焉先期郵行述與儀徵阮公芸臺所爲傳抵余丐銘其墓公故視學浙江時識熊飛於侗人中而貢之太學者熊飛博雅君子也其母賢母也爰爲之銘子二熊飛優貢生熊詔女適增廣生陸秩孫金鏡銘曰

侯周世族湘谿之涯少誦孝經淑溫柔嘉曰歸於徐拊

据孔嗟矧喪所天、吁魯婦髻、鬻爾故巢、風交雨加、漂搖
鄰屋、重茅、僅遮、攜爾兒女、日呼而爺、課兒詩書、是耕是
畝、有織者箔、有縑者車、冬雪夜映、夏蜩晨譁、指血如赭、
眶淚若麻、有母窮老、白髮、糝、以養、以孝、逆之、於家、逢
歲凶、饑、野鳴、餓、駕、藜、藿、不充、啟門、嘔、啞、兒長、力學、六經
梳爬、舉舉、疑疑、行無、回、哀、惟九、方歎、識駟、與驂、獻之、璧
雍、蔚爲、國華、胡斂、孺人、榆景、西斜、廟山之遙、溪谷、裕、猷
體魄、偕、臧、白楊、槎、枒、我銘、其幽、是賢、母耶、

○朱恭人墓誌銘

恭人姓朱氏同邑富安鄉人國子生諱汝綸女也歸於余以乾隆六十年四月一日卒距其生乾隆六年六月十九日得年五十有五閏四稔以嘉慶三年十二月八日命兒子緡武緡文葬恭人於富安鄉礮石火之新阡余以恭人閫行當質言之不欲徵銘於當世士大夫爰含泪泚筆誌其崖略以藏諸幽恭人母鄒孺人工於詩恭人幼稟母教好讀書而不事吟咏其歸於余也余方爲諸生家窶艱先大父及余皆以教授館於外恭人佐先妣拮据將茶艱苦食淡恆不給比余爲

京朝官復窮甚。恭人之拮据。如余爲諸生時。其間余累遭喪。連蹇顛踣。所以累恭人者。恭人不言而處之。泊如。迨余出外。爲監司祿漸豐。恭人相砥以廉。節縮衣食。又如余爲

京朝官時。烏虜恭人已矣。其處已也。苦鮮樂逸也。其事親也。誠靡假飾也。其待人也。仁而有恩。罕涼薄也。以余疎戇無所似。又落落然不問家有亡。惟恭人相之。庸底於成。令造物者不至奪之速。而相余以至於今。則余可無顧於私。而殫力於公事。其益余者更何如也。夫余之於世。俛仰骨月。倫紀之間。其負疚者多矣。又奚忍銘恭

人子二。緇武國子生。緇文出。繼余弟。濂女三。適侯補鹽。
大使仁和張姚仁同邑諸生施曾培。嵇文綸女一。側出。
孫昌熾。孫女二。緇文出。銘曰。

悌哉斯原。實鄰而宅。而所進來。歷歷仟佰。生斯葬斯。維
而之宮。而先我藏。佗時則同。

○曹烈女墓誌銘

烈女姓曹氏浙江海寧人父某家甚貧幼許字查世裘
世裘明順天府尹秉彝十世孫未婚而世裘之父某先
迎烈女至其家烈女性婉婉舅姑俱篤愛之迨年二十
有五婚有日矣而世裘夭烈女哀慟不欲生舅姑慰譬
之不從卒閉門服酒死時爲乾隆癸丑九月五日其鄉
人將白諸州以聞上官而旌其門閭世裘之族父查揆
先賦烈女行悼之詩而余誌其墓禮曰女子幼從父兄
嫁從夫未嫁而殉其夫歸震川氏以爲過而汪氏鈍翁
著宋烈女傳則以忠孝義烈之行足以砥厲末俗而不

嫌其矯激。蓋注氏之詞甚辨。夫未嫁而以身殉去。雖稍過而不失其正。況烈女縱未成乎婦。而幼撫於舅姑。則夫婦之義已著。尤與未至夫家而夫死者不同。孔子之荅曾子問曰。取女有吉日而女死。壻齊衰而壻既葬而除之。夫死亦如之。此言女子於其夫之死。必服斬衰以弔也。未嫁夫死而服斬衰以弔。此禮或不行於今。若烈女已至夫家。則於世義之死。其服斬衰無疑。既服斬衰。一旦除凶服去而他適。此義之所不敢安也。先王制禮。準乎義與情而爲之。制情所難強。固不欲強中材以必從。而賢知之過。卽過乎情而未始不合乎義。亦未嘗不

樂子之以正人心而厚風俗如烈女者矢不二之節恍
慨引決較然不欺其志豈非聖人之所許耶烈女以某
年月日與世褻合葬於某原余重其義迺爲之銘辭曰
海昌之陽來悲風些連蜷冬青鬱蒼松些貞魄其藏閼
幽宮些化爲子規晝啼血些生不同衾死同穴些海波
不竭名不滅些

淨慈寺可成禪師塔銘

乾隆乙卯余官杭州潘侍御庭筠數爲余言淨慈寺可成師之賢余數以事過淨慈師貌癯樸塞木訥言若不
能出諸口然神充而氣暇戒嚴而色愉望而知爲有道
力者一日坐師之無量佛堂時余方權臬事師爲余言
好生之德人命之重陳說因果疊疊然逾晷散去余畱
詩以贈竝作圖誌其事無何聞師得微疾再訪之神色
如常而師竟以是年之十二月十五日逝矣師名際珍
可成其字號雪隱浙江金華人俗姓陳氏年十歲薙染
於衢之烏石菴又十年至錢唐受記刻於淨慈佛公實

蔭遂居淨慈旣而主湖州之上乘寺最久佛公示寂衆以淨慈非師不可大吏徇衆請以師名上於

朝乃移主焉余識師晚而師遽逝師之爲人不能悉其詳邵子志純嘗爲師傳稱師謙抑自下性喜推解而又室中無絲毫畜沒時衣袴皆單布無棉絮者志純交於師其言可信烏虜足以傳矣師生以乾隆庚申二月二十九日僧臘四十有六世壽五十有六嘉慶二年某月某日其嗣法弟子碧華宏道將奉師骨建塔於南屏山之陽來請銘銘曰

臨濟宗傳溯衣鉢淨慈佛公遞續述師來南屏復豎拂

我官於杭到法筵獨叩衆妙聞風旛空堂問答多道言
去來倏忽一彈指蟬脫人間秋葉委我銘其藏付禪史

先府君行述

嗚呼痛哉吾父竟棄不孝瀛等而從大父母於地下耶
昊天不弔、疊降鞠凶、一年以來、大父母相繼見背、吾母
之歿甫數月、不孝等苦出沈迷、偷生視息、方竊念吾秦
氏自五世祖海翁公而下、世享大年、吾父含淳秉懿、鍾
德於躬、宜臻耄耋、不孝等抱終天之恨於吾母者、冀於
吾父盡一日之養、以稍追罪愆、不謂猝嬰末疾、復致奄
棄、嗚呼痛可言耶、伏念吾父束脩砥行、詘不得信其生
平大旨、有不可不傳於後者、謹就見聞所及、濡血和墨、
粗陳梗概、惟當代立言君子採擇焉、府君諱鴻鈞、字心

陶號世萊系出高郵宋贈龍圖閣直學士少游先生諱
觀少游公子處度公諱湛以政和中爲常州倅因家於
常十傳至瑞五公諱維禎當元初又著籍無錫是爲吾
秦氏始遷無錫之祖又四傳至封武昌府知府脩敬公
私諡貞靖先生諱旭貞靖之次子爲孝子養恬公諱永
孚養恬公生南京都察院都事樂易公諱鏜樂易公生
湖廣辰溪縣知縣封戶部員外郎存赤公諱淮存赤公
生雲南永昌府知府封太常寺少卿文橋公禾文橋公
生巡撫湖廣右副都御史舜峯公諱燿舜峯公生國學
生鄉飲賓太清公諱竣太清公生國學生公蕃公諱仲

錫公蕃公生以時公諱德澄是爲府君高祖公蕃公之
仲子海翁公諱德藻是爲府君本生高祖入我

朝竝

贈光祿大夫刑部尙書曾祖國學生燈巖公諱松岱高
節有文著書甚具崇祀本縣東林道南祠本生曾祖對
巖公諱松齡歷官至 日講官起居注左春坊左諭德
贈光祿大夫刑部尙書祖訥菴公諱實然歲貢生候選
訓導

贈奉直大夫山東平度州知州考溪隱公諱春田國學
生鄉飲大賓

封奉直大夫山東平度州知州妣呂繼妣黃

贈封俱太宜人府君同父昆弟六人府君居長年十一
呂太宜人歿府君自以幼失恃終身哀慕遇諱日素服
變食輒悲涕二十一由府試第一補縣學生江蘇巡撫
文登徐公士林觀風常州試其文拔置高等學使尹公
會一莊公有恭先後按試時佐二公幕者爲王已山先
生步青劉海峯先生大槐皆精於文律所識拔多績學
之士府君亦以是出其間府君論文不喜囂同剽竊之
習於古今人文之工窳真贗無不洞見其底裏所作經
義規撫先正一以思泉爲宗而長題剪裁則法本荆川

卒以此困屢踏省門不得讎然能守其學亦卒不變乾隆甲戌入成均府君性耿介褻柔中剛不能事干謁居京師無所遇丙子報罷幡然歸里自是遂絕意進取杜門課不孝瀛等讀書嘗選史漢及唐宋人文字手自抄錄以授之燈下命誦五經爲講說常至夜分先妣篝火其旁紡績以俟不孝瀛隨府君寢天甫曙促令枕上背所誦書日以爲常不孝瀛年十六爲博士弟子府君曰吾家科第代有顯者而汝曾王父王父皆不達以逮於吾又不達今所望者汝也旣而不孝瀛又屢試屢黜府君顧未嘗介懷時有鉅公趨不孝瀛北行謂功名可戾

契致者府君赧然曰窮達命也。汝年未壯。躁進非宜。蓋府君安於義命。不肯教子弟以速化如是。辛巳山東按察使沈椒園先生廷芳。延主沂州琅邪書院講席。沂文風萎茶。府君悉心指授。不數年。諸生聯翩掇科第去。府君之文。不遇於時。而所造就甚衆。一時稱盛。甲午不孝瀛舉京兆。丙申

召試授中書。丁酉庚子遇

覃恩。府君兩荷

推封。庚子春

聖駕南巡。府君隨先王父伏謁山園。先王父年八十五

府君亦年六十有二俱拜文綺之

賜是年秋仲弟濂登賢書辛丑不孝瀛以中書爲軍機
章京時叔父震鈞官平度州知州先王父母就養官舍
府君往省視率先王父命歸里癸卯四月先王父歿於
濟南行館府君聞訃以不克視含殮號踊幾絕九月不
孝瀛隨

歸盛京於塞外得府君書知先妣患肺疾心甚憂悸比
還京而先妣之訃至不孝瀛踉蹌回籍而繼王母黃太
宜人歿於里第府君纍然縗絰相抱悲慟不孝瀛敬以
六十不毀爲府君請而府君衰年多痛俯仰內傷不孝

等又侍奉無狀不數月而府君亦長逝矣。天平痛哉。府君舉止凝重。作書與兒輩。雖匆遽必端楷。晚以家世多壽。自號世萊。嗚呼。夫孰知府君年六十餘。尚得侍先王父。而不孝等。今已欲重侍府君而不得耶。府君事親誠尤友愛諸弟。爲人坦夷。不設城府。接後輩。姁姁嫗嫗。都忘爲丈人行。家雖貧。無儋石儲。雅好客。客之過府君者。府君爲之授館舍。治行李。典衣剝薦。常不暇給。居平尤慷慨尚義。親串中有窮老無子者。府君贈以婢。得舉子。邑有大姓女。以貧故鬻於毘陵某氏。府君贖還嫁之。其他推解之惠。不可一二數。嘗舉袁盎。噲安陵富人語以

語朋齒人或侮府君且有受府君恩而其後背負者府君俱不之校也不孝瀛官於

朝府君嘗一至京師以王父母年老亟歸吾家味外閣故有長松一株數百年物也府君六十初度之辰不孝瀛作圖乞京師士大夫爲詩文以壽府君其後六年不孝瀛宿海淀直廬夜夢松忽仆覺而惡其不祥尋聞先王父訃大慟以爲竟驗不謂夢寐之兆更徵於府君不孝瀛昏迷贅亂茫不知省嗚呼痛哉府君生以康熙己亥十一月初三日卒以乾隆甲辰六月初九日享年六十有六

敕封文林郎內閣中書配徐孺人崑山歲貢生

贈內閣中書諱德宗女

敕封孺人先妣仁孝恭儉善持家府君授徒四方撤捐
內政辛苦勤愷族黨稱賢前府君一年卒事詳家傳子
五長卽不孝瀛次漩國子監生出嗣叔父廣鈞次濂乾
隆庚子科舉人方略館校錄候選知縣在京師聞府君
訃擗踊號泣以哀毀卒別有行略次沆國子監生四庫
全書館謄錄次淳女三人一適武進太學生萬恂一適
江都王桂林一未字孫三人緡武緡文廷棨孫女六人
一字仁和太學生張姚仁餘皆未字不孝等哀荒無緒

深懼虛辭飾美以重誣先人用敢質言大略伏惟大人
先生哀而賜之誌傳銘誄不孝等世世子孫感且不朽
後學海康陸昌齊填諱

。先妣行述

烏庠痛哉先妣棄養閏九月矣先妣梱行嘗乞宗伯新建曹公爲傳今年夏先府君又卽世瀛謹詮次生平行誼爲文以述因追維先妣仁慈孝敬有傳中所未及詳者年運以往恐不復省記爰又涕泣而謹誌之如左先妣姓徐氏世爲崑山右族曾祖諱乾學官至刑部尚書祖諱樹敏官河南安陽縣知縣父諱德宗歲貢生

妣贈內閣中書妣秦孺人卽不孝先曾王父女也先妣性婉嫕少得父母懽外王父高才不遇豪於詩酒先妣幼時每脫簪珥貫酒以奉外王父外王父輒喜酒後遇

有不可得先妣言輒解年二十歸先府君無何外王父
母相繼沒久未葬而舅氏亦沒先妣請於先王父爲擇
地吾邑惠山之麓葬外王父母而以舅氏之櫬祔焉吾
家故世族迨先府君而中微久困諸生貧甚家僅存瘠
田數畝悉鬻之而入京師應京兆試復不遇先府君性
磊落於家人生產不甚訾省自京師歸又常授徒四方
時先王父母皆在堂先妣以婦兼子甘毳之奉必竭其
誠先王父嘗語人曰諺謂孝順婦難作無米炊如吾兒
婦真能作無米炊也方先府君之游於外也往往挈瀛
以從嘗歲暮客武昌先府君擁衾夜坐瀛侍側語家事

相對欷歔時或先府君出游而瀛在家先妣衣紉都付
質肆恒日闕無儲先妣顧瀛泣瀛亦泣瀛以乾隆丙申
得中書將北行別先妣先妣送瀛至中堂曰兒去毋念
我哽咽幾不能出聲烏虜夫孰知此卽母子永訣之日
耶先妣病瀛方隨

駕奉天欲乞假不得比還京師而凶問至矣痛哉痛哉
今年春奔喪歸猶以先府君在不敢過毀今已矣自維
罪大孽厚尚何以爲人子耶先妣鍾愛瀛瀛五歲出痘
危甚先妣日夕禱於神得無恙自後疾病寒暑所以煥
咻之者雖旣壯猶然瀛十三四歲時先府君在京師先

王父嘗集邑中後進與瀛爲時文之會家既貧又值歲
祲而先妣時其饑食無勸容每夜督課燈火熒熒徹曉
先妣方面豐頤於相法宜壽終身無疾言遽色雖寢艱
親屬中有乏絕者常推食食之瀛兄弟五人妹三人皆
自乳恩勤鞠育精力消盡復困於家務飲食不時卽食
不過一盂瀛每以爲慮懼以辛苦損其天年而今果然
也痛哉先妣生以康熙辛丑十二月十八日卒以乾隆
癸卯十一月初十日年六十有三子女婚娶已具先府
君行述不復具

朱恭人行略

恭人姓朱氏世居無錫之富安鄉國子生諱汝綸之女
妣鄒孺人通書史生恭人而慧親爲訓讀龐識文義余
十二三歲時頗以能文知名里中孺人稔知之以恭人
字余十六歲余爲諸生家故貧年十九贅於婦家恭人
年二十一矣閱一年余偕恭人至余家時兩世尊章俱
在堂見恭人端重寡言笑皆賀得賢婦自是余屢困省
門之試衣食奔走恭人辛勤劬瘁悉罄其嫁時簪珥甲
午余舉順天鄉試丙申以

召試賜中書官於

朝踰年恭人挈兒女以北先大夫實送之無何先大夫
歸而余與恭人居宣武門外之橫街旣而移居者三俸
緡所入不足供僦屋芻秣之貲繼入直軍機塞外隨從
之役歲以爲常趨裝治具料檢不遺錙銖而不以纖悉
累余計恭人隨余居京師者凡七年癸卯冬聞先妣徐
太恭人訃余先還里復遭先大夫之喪乙巳夏六月恭
人始南還丁酉春服除又偕恭人北上余自淮渡河登
車而恭人由水路行舟中疾作幾殆以水涸凡四閱月
始達潞河自是恭人隨余居京師者又凡七年余屢遷
官而直軍機處如故其間值臺灣安南用兵羽書旁午

余辨色晨興燭黑退直不暇問家事皆恭人任之男女
婚嫁調度張弛一中於禮癸丑冬余擢浙江溫處道恭
人便道過家時鄒孺人已久故恭人迎余外舅偕行至
溫州甲寅冬余權臬事恭人自溫來杭一日鞫海盜燈
下錄其獄恭人在旁曰聞海盜多閩人言語不可曉又
無賊證是獄得毋可疑乎余聞之瞿然覆治之果多難
民今年春余遷杭嘉湖道而恭人遽歿悲夫恭人向爲
貧家婦習勞勤體雖羸縫衽浣濯灑掃皆親執之所育
男女多自乳比年來余祿食稍豐而恭人從官南北川
塗往來莫或遑息居常仁慈多惠愛遇下尤有恩歿之

日內御者老弱哀啼皆失聲子二緡武監生娶武進萬氏緡文出爲余弟濂後娶同邑楊氏女三人一適仁和監生張姚仁一適施培元一字嵇恭人生以乾隆六年六月十九日卒以乾隆六十年四月初一日年五十有五初遇

覃恩封孺人再封宜人今例封恭人烏虜方余遭先人之變尚遺季妹未嫁恭人視余妹猶妹也余弟濂早世其嫗依恭人以居恭人視其娣亦猶妹也死生骨肉之間惟恭人能曲成吾志以不至滋余罪戾恭人歿其誰能助余者乎恭人性質直遇事持論有遠識余始或互

有可否而事後輒服其言恭人歿又誰爲余言者乎謹
撫大略用驗立言之君子

亡弟士蓮行略

嗚呼士蓮竟殉吾父死矣。自先妣棄養先君子尋又捐館。余方哀慘無生理。惟是賤貧兄弟相依爲命。而士蓮又亡。士蓮已矣。其如余何也。余以在苦。出中不能爲文。以哭士蓮。顧念無以不死吾弟。且抒余痛。爰述其崖略。如左。士蓮姓秦氏。諱濂。別自號最齋。世系竝詳先君子行述。士蓮少倣儻。不事脩飾。豪於酒。酒酣以往。心雄氣盛。譚噱間作。頗自負。其於爲文。亦奔放不肯受束縛。嘗語其友曰。文以氣爲主。吾惟寫吾所欲言。而不耐自繩削也。少從余受業。獨嚴事余。每一藝成。爲抉摘其瑕疵。

則帖然服年二十餘尚困童子試欲中道廢余攜之北上入成均乃以庚子秋舉京兆闈藝出見者歎賞傳誦吾師東武寶公少所許可見其文亦盛譽之辛丑下第歸士蓮自爲孝廉折節加脩謹顧多病先君子戒其勿飲遂止酒癸卯冬先妣歿士蓮哀毀逾禮旣永平太守朱君芫星具書幣延主敬勝書院講席士蓮不欲行先君子以家貧藉脩脯促之行士蓮重違先君子命不得已就道至永平不三月而先君子歿余以士蓮有至性又素羸瘠慮其遽聞訃不勝喪訃至士蓮果號慟嘔血力疾星奔至京師時余妻孥尚滯都下士蓮將以八月

十六日挈之南還而士蓮竟不起以八月十一日卒於邸舍嗚呼悲夫士蓮固死於孝而天之降割於吾家則亦甚矣先是士蓮考充方略館校錄例得議敘知縣以士蓮之志將有所施設以有用於世而竟止於是命也夫士蓮性伉爽與人交披露肝膽無畛域以是士蓮死聞者咸出涕嗚呼士蓮與余則兄弟也余授經士蓮前于後嗚晨夕追從廡間則兄弟而師友也二十年來余游宦偃蹇窮愁無聊之況惟士蓮相共之日爲多士蓮已矣余又何忍敘士蓮之生平耶此余所以掇筆嗚咽而終無以抒余之痛也士蓮生以乾隆壬申正月二十

日逮其沒得年三十三娶張氏無子余以次子緇文爲
之子

。湖北襄陽府襄陽縣呂堰驛巡檢王君行狀

長洲王君聽夫官湖北襄陽縣呂堰驛巡檢會枝江賊以邪教倡亂擾呂堰君罵賊不屈死事聞得

旨照縣丞例議卹

詔入昭忠祠

賜祭葬予雲騎尉世職

聖朝褒忠之典于是爲甚鉅君之兄鐵夫余友也自其華亭官所以書抵余並具君行實請爲狀君名翼孫字以燕聽夫其號江蘇長洲縣人明少傅大學士諡文恪諱鏊者其十世祖也會祖續縣學生贈欽縣教諭祖世

其乾隆丁卯舉人績學有文卽教諭公也父寅熙以君
爲巡檢

封如君官母繆氏

封孺人孺人生子三次卽君封巡檢君負才不偶習吏
事幕游齊魯吳越間挈君與俱以是君亦能通曉天下
事故刀筆筐篋靡不諳習旣而從故昭信伯馬蘭鎮總
兵官李君奉堯遊李君歷官南北其承事所至奉天熱
河盤山湯山君悉偕行得縱覽山海關古北口諸阨塞
兼善騎射能挽五石弓左右射乘騎三四百里不頓舍
乾隆五十年考充宗人府供事敘勞爲從九品五十五

年分發湖北攝荆門州建陽驛巡檢事補興山縣典史
無何坐在建陽失察所隸驛卒聽從知州家奴毆人至
死事落職五十九年投牒吏部復原官復之湖北逾年
補襄陽縣呂堰驛巡檢未及到官檄攝長樂縣典史數
月復兼署其縣丞長樂地嶮遠百姓業樵採多困乏會
湖南用兵上官檄縣設兵爲防縣遽下帖團練鄉勇而
不給食不立頭印吏因緣爲姦民惴惴懼君條列數事
上縣府寢不行長樂果有變而君已去長樂之襄陽受
呂堰驛事不二十日爲嘉慶元年正月枝江逆民之亂
作當陽應之侵及遠安于是鄖陽荊州宜昌施南諸府

州縣雜然相繼起而襄陽所屬南漳各縣亦所在嘯聚賊張甚呂堰無城守君聞事親自行度地形高下潛設戒備縣令捕邪教嚴常株及親鄰戶多逃亡君曉示招來俾耕種如常時二月賊起襄陽之黃龍璫蔓延附近君召募鄉勇預立備賊章程八條一臨陣奮勇以期必勝一凡鄉勇十名設頭目一人頭目十人設總頭目一人各相鈐壓統於巡檢司一附近小村單丁弱戶皆遷呂堰鎮其丁壯俱充鄉勇赴營守望一設哨撥一定功過以昭激勸一儲軍食凡鄉勇力能自食者聽其無食之人設廠給飯酌立糧餉總頭目司其事一禁擅自遷

移除鄉勇外居民各安耕種毋聽謠言輕去失業一鄉
勇在營守望各相團習技藝不得飲酒賭博部署方定
而賊大至犯呂堰三月廿九日君出迎擊生擒賊先鋒
劉方達劉漢德陳起蛟三人手斬之而自屬藥爲狀白
大府告急請援已而賊來益劇君所率兵益潰去自度
不可守乃慨然曰死矣因爲家書別父兄封付弓兵劉
祿竝令劉祿詣官解取印上郡守且令從人徐升開道
行而自登大橋面賊而罵旣又令其吏廖之義往趣劉
祿之義甫及數步見解中火起不得進還顧賊已過橋
有數賊方環眎橋下之義意君已投河死遂從民舍越

牆免比賊退之義還見橋下沙壓露衣乃君迎擊時所著繼而襄陽守跡徐升至辨認亦如之義言八月某日賊再陷呂堰統師者從賊手搜獲君巡檢司印賊目俞宗武自言親殺驛官且言驛官從橋上獨身接戰連刃數人既中矛被傷遽跳而自投于水賊衆憤甚相與鉤出之猶罵不屈乃加攢刺而宗武加功焉毀其尸由是君死節事較然明白先是君守呂堰時今安襄鄖兵備道胡君齊崙方知襄陽府事檄君入城君曰某職守在呂堰呂堰我死地也竟不往蓋君之所以自處者審矣夫君一巡檢耳呂堰又區區一小驛當四達之衝猝遇

賊衆蜂屯蟻聚救援不至捐體脰蹈白刃卒荷

聖天子之褒榮與古人比烈亦偉矣哉君事親孝又善
事兄賊擾呂堰君猶作家書寄其父封巡檢君於揚州
而抵鐵夫京師鐵夫自京師就官南還道聞君死哭之
慟旣歸乃求廖之義所得君死時衣殮之又別遣其族
弟至君死所覓骸骨焉君娶尤氏生女子子一無子封
巡檢君以鐵夫次子嘉福爲君子君卒年四十始余交
鐵夫因識君君體幹短小略如鐵夫恂恂然言不能出
諸口而鐵夫嘗爲余言其在閩從提帥夜擒盜昏黑墮
海汊中援石巨躍而出又嘗乘騎過通州馬逸爲米車

所壓幾殆而其後好騎如故猶自熱河馳一晝夜達京
師兩事皆甚壯而不意其成大節遽如此鐵夫工於文
所敘君死節事頗精核可信余特刪次之以爲君狀將
以上諸史館焉謹狀